

# «Origen è er en po ena utopia»

Origen Festival Cultural: Program da stad

DA GION NUTEGN STGIER / ANR

■ Igl festival sa sviluppescha adegna duple tar ena occurrenza da solt. La raschung è tgi igls ballets dallas miglras tgesas digl mond tschertgan la collaboraziun cun Origen. Chesta stad dattigl er puspe ena producciun aint igl casti da Riom. Sen buna veia è igl project digls Mulegns. Aint igl frataimp vo igl Origen Festival Cultural gio ainten la 15ava stad culturala. Oz è igl festival da Giovanni Netzer en bung nom, betg angal nazional, mabagn er internaziunal. El è er or dalla vista turistica en magnet, cun carmalar adegna duple ameis dalla cultura aint igl Grischn. Er chegl tgi pertotga l'economia è l'occurrer da cultura da gronda valour, schizont surregional. La stad culturala 2019 scumainza igls 11 da zarcladour e cozza anfignen igl mez d'avost. Igl program cumpeglia radond 130 producciuns, tantas scu anc mai siva digl 2005. Per las preschentaziuns èn responsablas vers 100 persungas dalla cultura.

## Stgaffier igl mond da nov

Sapientivmaintg vegia el tscharnia per la stad culturala 2019 igl tema utopia, è detg Netzer, el tg'è an veir senn igl «cor» digl Origen Festival Cultural. Sch'ins discorra d'utopia, alloura s'imageschan blers ensatge bler migler ed oters lessan schizont stgaffier igl mond da nov. Utopia monta er blera fantaschia, invenziun singulara, imaginaziun particulara e betg igl davos er en po illusiu. Chels aspects ins dastga er attribuir ad Origen, en festival tgi tschertga dad eir novas veias e da dar alla regiun duple veta, graztga all'immensa fantaschia ed agl grond curasch. Igl mond canoscha fitg bleras istorgias tgi dereivan dall'utopia e percheglia seia ella er igl feil cotschen dallas producciuns dalla stad culturala 2019.

## En festival da solt internaziunal

Igls bung contacts tgi Netzer è tar las miglras tgesas da teater digl mond èn er pigl sies festival da gronda valour. La tor cotschna sen Gelgia è en li noua tgi igls pi ancunaschaints coreografs internaziunals on a cor per far experiments e per rachintar cun lour

ballets istorgias cun solt e musica. Er chesta stad èn da la parteida ballets da Vienna, Den Haag, Minca, Graz, St. Petersburg e scu punct culminont igl ballet da l'Opéra Garnier da Paris.

## Teater musical aint igl casti da Riom

A Riom ed agls Mulegns stattan segl program schinumadas miniatras da solt cun cant e musica. Ainten la sala da stil floreal digl hotel Liun agls Mulegns transfurma Netzer l'istorgia dallas violas da Faller aint igl taimp preschaint. Bel è tgi las miraglias viglias digl casti da Riom èn eneda puspe la culissa per ena producciun digl Origen Festival Cultural. Solt, cant e musica cumpeglia igl teater musical tgi vign sottamess cun las pi belas cumposiziuns da Franz Schubert. Sen turnea tras igl antier cantun è alloura scu adegna er la gruppa cumedianta d'Origen tgi procura cuagl toc «Cucagna» per bler muviment, temperamaint e humor sen tribuna. Ena

collaboraziun cun la ETH vignigl er a dar an connex cun las culissas dalla miniatura a Riom aint igl curtgign dalla «Villa Carisch».

## SRF è filmo per l'emissiun «Kulturplatz»

Igl project digl hotel Liun agls Mulegns seia sen buna veia, è punctuo Netzer. I dovra bagn anc blera lavour ed er pazientzga anfignen tgi la finanziaziun seia sot tetg. El dastga deir tgi bleras fundaziuns ed organizaziuns mossan interess per sustignier igl project digl hotel e dalla «Villa Alva» agls Mulegns. Plascheir vegia el tgi l'acziun da tschartger «padregns» e «madretschas», tgi paian dad 8000 francs anfignen 10000 francs per salvar igl hotel da 150 onns, porta gio igls amprens fretgs. Anfignen mesemda passada è digl reminet SRF filmo agls Mulegns ed a Riom per l'emissiun «Kulturplatz». Emessa vign chella igls 5 da zarcladour 2019 siva dallas novitads «10 vor 10».



Giovanni Netzer, igl intendant digl Origen Festival Cultural, è preschentoier en program per la proxima stad, en program tgi è anc mai sto schi grond e vast e chegl siva digl 2005.

FOTO G. N. STGIER


## L'AURA

### Per gronda part sulegliv

**Situaziun generala:** Ina zona da pressiu bassa sa mova vers ost. Sia influenza tschessa.

**Oz:** En il nord per gronda part sulegliv, suentermezdi nivels da cumulus. En las Prealps leva tendenza d'uradis. En il sid avantmezdi sulegliv, suentermezdi per part surtratg ed uradis locals. Temperaturas maximalas durant il di en l'entira Svizra en fin 22 grads.

**Prognosas:** En il nord la sonda sulegliv, suentermezdi nivels da cumulus ed intgins uradis u urizis. La dumengia per part sulegliv e sitg. En il sid la sonda surtratg ed intgins uradis en l'Engiadina, dumengia pli e pli sulegliv e sitg.



## NOVITADS WWW.RTR.CH

### Nova veta per l'hotel «Scuol Palace»

Gia sin la stad vul l'organisatur da l'Israel «Tourplus» puspè avrir l'hotel. Il mardi sajan represchentsants da la vischnanca e dal turissem da Scuol sesids ensem cun gliued da «Tourplus». Quels spetgan en emprima lingia giasts gi dieus, nizzegian al cumenzament dentant sulet ina part da l'hotel cun 220 letgs.

L'hotel Palace è vegnì renovà dapi il 2013. Oriundamain han ins vulì avrir l'hotel gia il 2016. Uss duai vegnir avert la stad. Tenor il promotur d'economia da Scuol, Niculin Meyer, saja quai stà ina surpraisa. Avant l'inscunter da mardi n'hajan ins gi nagin contact tranter il possessur, Tourplus e la vischnanca. I saja planisà a fitg curta vista ed uss saja anc da guardar tge lubientschas da l'administraziun che sajan necessarias e da survegnir quellas tant pli svel.

### Hotel vegn manà koscher

Tenor ina collavuratura da Tourplus na vegnia betg a dar be giasts strict ortodox mabain er giasts moderads da tut il mund, ha infurmà Meyer. Sin la pagina d'internet da Tourplus figureschia Scuol gia sco destinaziun da stad. Quai munta che las dumondas administrativas ston vegnir scleridas entaifer in mais, per ch'ìl manaschi possa cumenzar la stad.

### Bleras dumondas anc betg scleridas

Il curt temp da preparaziun porta intginas problematicas. Per exempel n'èsi ad uschè curta vista betg pussaivel da porscher als giasts in access ad in bus local. Las cundiziuns na sajan uschia betg optimalas.

Plinavant na giaschan pliras chaussas er betg en ils mauns da la vischnanca. Per exempel las lubientschas da lavur per persunas che n'èn betg da l'Europa. Ils collavurats ha Tourplus sez. Il dumber vegn a depender da las reservaziuns.

Plinavant n'ha Tourplus er betg pudì dir quantas persunas che stuessan reservar per esser rentabel, damai ch'el n'ha anc naginas experientschas a Scuol.

### Stefan Schmid è nov directur da turissem en Val S. Pieder

**Da nov è il president da vischnanca er anc il directur da la nova Visit Vals SA. L'organiza-ziun turistica è vegnida fundada la sonda passada.** El è vegnì elegì d'in gremi da l'unìun schliada Visit Vals e dals commembers da la suprastanza da la Sportbahnen Vals SA.

La nova Visit Vals SA unescha las pendicularas, las lavurs da turissem d'enfin uss e la cumissiun da marketing locala. Da trais unìuns turisticas datti uss pia ina suletta, responsabla per las acziuns per giasts, l'infurmaziun, il marketing, l'infrastructura e la gastronomia en il territori da skis.

### Forzas novas e veglias

Per realisar en l'avegnir ils plans po Stefan Schmid quintar cun forzas veglias: Janine Westenberger è manadra da gestiun dal turissem e vegn da nov manadra dal sector da l'infurmaziun ed events. Maurus Tomaschett, il directur da las pendicularas, vegn da nov manader da sector da las pendicularas.

Presidenta dal cussegl d'administraziun da la nova Visit Vals SA è da nov Artemis Truffer, la fleglia da Pius Truffer. Cumplet nova n'è la fatscha dentant betg per Truffer. Avant dus onns è ella vegnida elegida en il cussegl d'administraziun da las pendicularas.



Il president communal da Val S. Pieder Stefan Schmid daventa nov directur da turissem.

FOTO RTR

### Territori da Radons a Savognin duai vegnir ennavà

Las pendicularas da Savognin vulan investir en chanuns da naiv per il territori da Radons. Ils proxims tschintg onns duai l'entir territori da Radons vegnir ennavà cun naiv tecnica, ha ditg Markus Schröcksnadel, il president dal cussegl d'administraziun da las pendicularas da Savognin.

Schröcksnadel ha ditg ch'ins veglia probablmain anc quest onn installar ils emprims cha-

nuns da naiv tranter Naladas e Somtgant, quai è la pista che collia Radons cun il territori da skis central.

Gia il favrer da quest onn è vegnida fundada la «Savognin Beschneigungsinfrastruktur AG» ch'è responsabla per las investiziuns da far naiv. Presidiada vegn la societad acziunara da Schröcksnadel. Per il mument betg da la partida è la vischnanca da Surses.